

OPŠTI USLOVI KORIŠTENJA MODULA ZA PRISTUP PREDMETIMA PUTEM INTERNETA

PODRUČJE PRIMJENE

Ovim Opštim uslovima utvrđuju se prava, obaveze i uslovi korištenja Modula za pristup predmetima putem interneta.

POJMOVI

E-SUD – Mobilna aplikacija za pristup predmetima.

JPK - Jedinstveni pristupni kod za pristup pojedinačnom predmetu koji se izdaje za sve vrste predmeta osim za predmete krivičnog referata.

Korisnički račun - Omogućava pristup predmetima u kojima stranka, u skladu sa zakonom, ima pravo uvida i za koje raspolaže JPK-om, a koji se pridružuju korisničkom računu imaoca.

Korisnik – Korisnik je fizičko lice, predstavnik pravnog lica ili advokat koji pribavi validan JPK i/ili kreira korisnički nalog pomoću kojeg pristupa podacima korištenjem Mobilne aplikacije za pristup predmetima „E-SUD“ i Modula za pristup predmetima putem interneta.

Lozinka – Lozinka vezana za korisnički račun u Modulu za pristup predmetima putem interneta, a putem koje Korisnik pristupa i Mobilnoj aplikaciji za pristup predmetima „E-SUD“.

Modul - Modul za pristup predmetima putem interneta na adresi <https://pravosudje.ba/predmeti/B/login>.

OPŠTE ODREDBE ZA KORISNIKE MODULA

Domaćim fizičkim licima (rezidentima) smatraju se :

- fizička lica državljani Bosne i Hercegovine koji navedeni status dokazuju ličnom kartom ili pasošem Bosne i Hercegovine izdatim od strane nadležnog organa Bosne i Hercegovine;
- fizička lica koja posjeduju pasoš Bosne i Hercegovine koji je izdat od strane nadležnog organa, ambasade ili konzularnog predstavništva Bosne i Hercegovine, a nemaju prijavljeno mjesto prebivališta/boravišta u Bosni i Hercegovini.

Stranim fizičkim licima (nerezidentima) smatraju se:

- fizička lica koja nisu državljani Bosne i Hercegovine, koji navedeni status dokazuju ličnom kartom za strance koja je izdata od strane nadležnog organa u Bosni i Hercegovini ili pasošem zemlje čiji su isti državljani.

Minimalni uslovi koje korisnik Modula mora zadovoljiti kako bi mogao koristiti isti su:

- posjeduje ažurnu verziju internet pretraživača;
- da prihvata Opšte uslove korištenja Modula.

SPECIFIČNOST KORIŠTENJA MODULA

Modul omogućava pristup svim dokumentima u predmetu, sa izuzetkom internih dokumenata i odluke suda do momenta evidentiranja povratnice o urednom uručenju odluke stranci.

Autorizacija korisnika se vrši korištenjem kombinacije broja sudskog predmeta i JPK-a ili korištenjem Korisničkog računa i Lozinke.

Modul prikuplja sljedeće informacije o korisniku:

- operativni sistem;
- verziju internet pretraživača;
- veličinu ekrana.

Navedene informacije se koriste isključivo za optimizaciju korisničkog interfejsa/sučelja i neće se koristiti za druge svrhe niti prosljeđivati trećim licima.

OBAVEZE KORISNIKA

Prilikom korištenja Modula, Korisnik je dužan da poštuje Opšte uslove korištenja i da se pridržava uputstava za korištenje, kao i važećih propisa.

Korisnik je dužan dobijene podatke za pristup čuvati u tajnosti i ne otkrivati ih trećim licima.

Za korištenje Modula Korisnik mora obezbijediti pristup internetu. Visoko sudsko i tužilačko vijeće Bosne i Hercegovine (VSTV BiH) ne snosi odgovornost za bilo kakve troškove koje Korisnik može imati prema trećim licima prilikom korištenja Modula.

Dokumenti, podaci i informacije prikupljene upotrebom Modula ne smiju se bez izričite saglasnosti VSTV BiH reprodukovati, distribuirati ili na bilo koji način koristiti u komercijalne svrhe, ili na bilo koji drugi način koji može uzrokovati štetu VSTV BiH ili trećoj strani.

Zabranjen je reverzni (obrnuti) inženjering Modula, što uključuje bilo koju radnju analize, prevođenja, rastavljanja, dekompiriranja, dekriptiranja ili dekonstrukcije podataka, softvera, protokola, protoka podataka, usluga, ili bilo koju metodu ili postupak pribavljanja ili konvertiranja bilo kojih informacija, podataka ili softvera iz jednog oblika u oblik koji je razumljiv čovjeku.

Zabranjeno je Modul iznajmljivati, dati u zakup, posuđivati, preprodavati, hostati trećoj strani ili za treće strane.

Zabranjeno je nadograđivati ili degradirati komponente Modula, te koristiti Modul i/ili njegovu infrastrukturu za stvaranje drugih aplikacija ili izvedenih radova.

Korisnik ima obavezu i odgovornost da za pristup predmetima putem interneta isključivo koristi Modul i/ili E-SUD i strogo je zabranjeno pristupanje na bilo koji drugi način.

Zabranjeno je JPK i/ili Korisnički račun koristiti za pristup predmetima preko drugih aplikacija ili web pristupa.

VSTV BiH će poslati upozorenje Korisniku koji prekrši obaveze propisane ovim Opštim uslovima korištenja. Ukoliko korisnik i dalje nastavi da krši obaveze, VSTV BiH zadržava pravo onemogućavanja daljeg korištenja Modula za pristup predmetima putem interneta, uključujući ukidanje postojeće registracije, te zadržava pravo da protiv svakog takvog korisnika pokrene postupke pred nadležnim upravnim i sudskim organima.

LIČNI PODACI

VSTV BiH će lične podatke Korisnika navedene na potvrdi o preuzetom JPK koristiti isključivo za realizaciju usluge, te za potrebe komunikacije VSTV BiH sa korisnikom.

PROMJENA USLOVA

VSTV BiH zadržava pravo izmjene Opštih uslova korištenja Modula, bez prethodne najave.

Važeći Opšti uslovi korištenja nalaze se na službenoj web stranici VSTV BiH. Smatrat će da je Korisnik prihvatio izmijenjene Opšte uslove korištenja ako u roku od dana 15 dana od dana kada su izmijenjeni Opšti uslovi korištenja ne dostavi pismeni prigovor VSTV BiH.

ISKLJUČENJE ODGOVORNOSTI

VSTV BiH isključuje odgovornost za svu štetu nastalu korištenjem informacija pribavljenih putem Modula. Svi podaci pohranjeni unutar Modula su informativnog karaktera, dok se zvanični dokumenti nalaze u sudskom spisu i kod stranaka kojima je izvršena uredna dostava dokumenata.

VSTV BiH isključuje odgovornost za nemogućnost izvršavanja obaveza navedenih u ovim Opštim uslovima u slučajevima kada nastupe objektivne smetnje u obavljanju tih poslova, a pod kojima se naročito smatraju svi događaji i radnje koje otežavaju ili onemogućavaju komunikaciju između VSTV BiH i Korisnika a koje mogu biti uzrokovane višom silom, ratom, nemirima, terorističkim aktima, štrajkom, prekidom telekomunikacijskih veza i svih drugih događaja čiji se nastanak ne može pripisati VSTV BiH.

ZAVRŠNE ODREDBE

VSTV BiH zadržava pravo na eventualne prekide u radu izazvane tehničkim razlozima bez prethodne najave.

Na Korisnike Modula primjenjuju se ovi Opšti uslovi korištenja, a koji su Korisniku dostupni u periodu korištenja.

Preuzimanjem JPK, Korisnik potvrđuje da je pročitao i prihvatio Opšte uslove korištenja.

Na sve što izričito nije navedeno u Opštim uslovima korištenja primjenjuju se propisi kojima je regulisana ova materija.

Korisnik može tražiti odgovarajuća objašnjenja i instrukcije od VSTV BiH koja se odnose na primjenu Opštih uslova korištenja.

Ovi Opšti uslovi korištenja primjenjuju se od 29.5.2024. godine.